

## RESÍDUOS

# AVANZAMOS NA RECICLAXE E COMPOSTAXE?

Xan Duro

*O pasado 22 de xuño, nun pleno celebrado en Raxoi, o PSOE, co apoio do PP, decidiu frear o acordo acadado en abril para o tratamento dos residuos urbanos do Concello no Complexo Medioambiental de Tratamento de Residuos Sólidos Urbanos (RSU) e Asimilábeis da Mancomunidade de Concellos da Serra do Barbanza, integrada por Brión, Lousame, Muros, Noia e Porto do Son, e reestudar a súa viabilidade económica.*

Esta postura do PSOE contradí todos os informes técnicos presentados até o de agora. Xa no 2001 contratouse un informe técnico realizada por EGMASA, empresa pública dependente da Junta de Andalucía para avaliar as vantaxes medioambientais e económicas das distintas opcións. Este informe sinalaba que a opción máis axeitada sumando ambos conceptos era a construción dunha planta propia para a recuperación de materiais reciclábeis e para o aproveitamento da fracción orgánica dos residuos converténdoo en compost, enviando a SOGAMA os refugallo (previsto nun 15% do total). A segunda opción máis valorada foi unha combinación de reciclaxe e compostaxe co uso do vertedoiro municipal para os refugallo.

### "O goberno municipal do PSOE en Santiago frea o proceso da Compostaxe"

Un segundo estudio, encargado por decreto da Alcaldía en novembro do 2001 á empresa Lagares Enxeñaría, avaliou detidamente a opción proposta no estudio de EGMASA fronte ao ofrecemento de participación na Planta de Compostaxe de Lousame realizada pola Mancomunidade Serra do Barbanza. O resultado da avaliación recomendaba a participación no proxecto de Lousame polo aforro na construción dunha planta propia.

En abril do 2003 negociouse un acordo coa Mancomunidade do Barbanza para integrar a Compostela na Planta de Lousame. Este acordo supuña a construción dunha planta de transferencia no municipio e o transporte dos residuos a Lousame. Nela procesaríanse todos os materiais procedentes da recollida selectiva para o seu reciclado ou compostaxe, depositándose o material de rexeitamento (entre un 30 e un 15%) nun vertedoiro axeitado xunta a planta. Os informes, respaldados polos técnicos municipais, indican que o custo para os/as cidadáns subiría un 4% fronte ao 20% de SOGAMA, polo que a opción de Lousame presenta un aforro de 1,3 millóns de euros anuais.

ADEGA leva anos demandando unha xestión adecuada dos RSU e loitando contra a incineración, que non considera unha solución posto que incrementan a toxicidade dos residuos finais, xerando fumes e escuras con metais pesados e contaminantes canceríxenos como as dioxinas e furanos. Nunha incineradora como a de SOGAMA, o tratamento de 500.000 toneladas anuais de lixo orixina máis de 2.000.000 de t/ano de gases, arredor dunhas 100.000 t/ano de cinzas e escuras e 50.000 t/ano de augas residuais que van a atmósfera, aos ríos e ao chan.

### "A opción da compostaxe e reciclaxe en Lousame presenta un aforro de 1,3 millóns de euros anuais fronte á de SOGAMA"

Para ADEGA a xestión dos residuos ten que basearse nunha política de minimización dos mesmos mediante o procedemento de produción limpa, incluíndo o emprego de materiais reciclados e reciclábeis, conservando a enerxía, a auga, as materias primas e o solo, e sen empregar nen elaborar compostos químicos perigosos. Tamén debe ter en conta criterios de equidade e xustiza social. A redución en orixe, a reutilización e a reciclaxe e compostaxe (3R) pode dar solución a máis do 80% do lixo que xeramos.


O Concello de Lugo adoptou o ano pasado (goberno PSOE/BNG, tras unha intensa campaña de ADEGA) o acordo de construír unha planta de compostaxe propia. O Concello de A Coruña (PSOE) xan ten a planta de Nostián funcionando. O mesmo PSOE prometeu hai dous anos, na campaña das eleccións autonómicas do 2001, pechar a incineradora de SOGAMA no prazo máximo de dez anos. ¿Que razóns pode ter o goberno municipal socialista compostelán para contradecir esta práctica do seu partido e optar pola incineración de residuos en SOGAMA? Obviamente, razóns estritamente políticas e oportunistas: o mantemento de boas relacións co PP municipal que lle permitan gobernar en minoría e claudicación ante

as presións da Xunta son algunhas das explicacións que se están a barallar.

ADEGA-Compostela ten previsto iniciar unha campaña de información entre a cidadanía sobre o significado e custos das dúas opcións de tratamento de RSU e traballará para que a opción da compostaxe en Lousame sexa a escollida definitivamente.

## AUTOCOMPOSTAXE EN 150 VIVENDAS COMPOSTELANAS

Unha das liñas de actuación que viña impulsando o Concello de Santiago é a da autocompostaxe nas vivendas que dispoñan de horta ou xardín e queiran acoller-se voluntariamente a este programa. Este método permite o tratamento in situ do 50% do lixo doméstico, sen consumo de enerxía e sen residuos adicionais. O Concello cede aos particulares un composteiro familiar e corre cos gastos de información e seguimento durante os primeiros meses. Esta última actividade foi contratada a ADEGA, que xa a realizara con anterioridade para o Concello de Ferrol (programa do 2002) con excelentes resultados. Prevese que a totalidade dos composteiros se atopen instalados a finais do verán.



Romsés Pérez